



**Illumut Danmarkimiit avissaarniarneq inuup inuuneraniit naleqarnerusutut isigineqassanersoq
apeqquteqaat aallaavigalugu oqallisissiaq**

(Inatsisartunut ilaasortaq Aqqalu C. Jerimiassen, Atassut)

Apeqquteqaat aallaavigalugu oqallisissiatut sinnersuummut Inatsisartunut ilaasortamut Aqqalu C. Jeremiassen-imut qujanaq.

Uuma oqallisissiap qulequtaa aalajangersimaqqinnaartumik allataavoq. Tassalu taamaaliunngikkutta imaassaagut. Avissaassaagut inuuneq akigalugu?

Illumoortumik oqassaguma, qulequtaq tulluannigitsutut isigaara. Nunarsuarmi tamarmi inoqarpoq, namminermik naalagaaffeqarusullutik imaluunniit naalagaaffitsik illersorniarlugu toqussutigissallugu piareersimasunik. Tassunga Ukraine-mi sorsunneq assersuutissaavoq. Palæstiinamiut naalagaaffeqarnissaminnik kissaataat allaavoq. Maaniami nunatsinni taamatut inissisimangilluinnarpugut. Isumaqatigiisummik peqarpugut – Namminersorneq pillugu inatsit – Danmarkimut, uagut aalajangertussaallugu avissaarusunnerluta namminerisamillu naalagaaffinngorluta.

Taamatut oqareerlunga, nalungilara, oqallisissiamut qulequtarineqartoq oqqassaarutaasoq. Ersarissarniarlugu, namminiilernissamut illersuisut inuiaassutsimik pingaartitsivallaartut ilaannikkutnamminiilernissamut oqallinneq nipeqartilertarmassuk, oqallinneq inuup inuuneraniit naleqarnerusutut.

Qularutissaanngilluinnarpoq, aningaasaqarnikkut toqqammavissarput suli pilersissimangikkipput, inuiaqatigiittut aningaasaqarnertut ingerlatsinissamut, Danmarkimit bloktilskuddinit isumalluuteqarani aningaasarsiorneq. Ullumikkut imaappoq, nunatta isertitaasa affai sinnerlugit Danmarkimit bloktilskuddinit pisarmat. Tassa piviusoq. Aamma piviusuuvoq, ilimanaateqanngikkallarnera, qanittumi taassuma allangornissaa – tassami aningaasaqarnerup takutimmagu taamaattoqanngitsoq.

Taamaattumik uani inissisimavugut, illuatungaatigut avissaarusulluta, aappaatigullu ajunngitsorsiatta pisanunnaarnissaat ikissaatiginagu. Aamma akileraarutinit akitsuutinullu annertunerusunik akiliinissarput kissaatiginngilarput. Taavami qanoriliussaagut?

Demokraatit kissaatigaat, Danmarkimut oqaloqatiginninneq aallartinneqassasoq, periarfissagut suunersut paasiniarlugu. Bloktilskuddit avissaareernerme ingerlaqqissinnaanerpat isumaqatigiissusioreernikkut piffissami aalajangersimasumi ikilisikkiartuaartussatut? Takorloorneqarsinnaava maannakkut Naalagaaffeqatigiinnerme allatut sanarfisamik ingerlaneq, aalajangersimasunut ataatsimoorussilluni, kisiannili Kalaallit Nunaat politikikkut nammineertutut akueralugu? Imaluunniit allarluinnarmik?

Tassalu Demokraatit oqallinnermut isummersuutigigallagaat.



DEMOKRAATIT
DEMOKRATERNE